

आकाशवाणी

खबरां विजय बजाज कोला,

पैहले खास-खास खबरां:-

1. चुनांस आयोग ने आखेआ ऐ जे तमिलनाडू ते पच्छिम बंगाल च कुतै बी परतियै चुनांस करोआने दी सफारश नैई कीती गई ऐ।
2. केन्द्र सरकारै बेबहारी बरखा करी प्रभावत करसानें दी मदाद लेई घट्टो-घट्ट समर्थन मुल्ल पर कनक दी खरीद लेई मजूदा रुतै दा लक्ष्य 15 फीसद बधाइयै 3 करोड़ 45 लक्ख टन करी दिता ऐ।
3. भारती रिज़र्व बैंक ने Paytm Payment Banks लिमिटेड दा बैंकिंग लसैंस रद्द करी दिता ऐ।
4. अमरीका नै चीन दी इक बड्डी तेल रिफाईनरी कम्पनी पेट्रोकेमिकल रिफाईनरी ते ईरान दे तेल दी दुआई कन्नै जुड़े दी तकरीबन 40 कम्पनियें ते टैंकरें पर आर्थिक बंदिशां लाई दितियां न।
5. ईरान दे बदेश मंत्री अब्बास अराघची अमरीका ते ईरान बश्कार गल्लबात लेई कल रातीं पाकिस्तान दी राजधानी इस्लामाबाद पुज्जी गेदे न।
6. महिलाएं दे टी-20 क्रिकेट च भारत ते दक्खन अफ्रीका बश्कार 5 मैचें दी श्रृंखला दा चौथा मैच अज्ज रातीं जोहान्सबर्ग च खेडडेआ जाहग।

<><><><><><>

ते हून खबरा विस्तार कन्नै:-



ECI- TN-WB No. Repoll

चुनांस आयोग नै आखेआ ऐ जे तमिलनाडू च जंदे वीरवारें जेहड़े 75 ज्हार 64 केन्द्रें पर मतदान होआ हा- उन्दे चा सब्बनै गै केन्द्रें पर मतदान शांतिपूर्ण रेहा ते इसकरियै उत्थे परतियै मतदान करोआने दी कोई वजह नैई ऐ। इससै चाल्ती चुनांस आयोग नै आखेआ ऐ जे पच्छिम बंगाल दे 44 ज्हार 376 मतदान केन्द्रें चा कुसै च बी परतियै मतदान दी सफारश नैई कीती गेई ऐ। राज्य च जंदे वीरवारें पैहले चरण दा मतदान शांतिपूर्ण रेहा हा- इस करियै कुसै बी बूथ पर परतियै मतदान दी लोड़ नैई ऐ। पच्छिम बंगाल च पैहले चरण तैहत 92 फीसद शा मते वोट पे न। प्रदेश च दुए चरण दा मतदान 29 अप्रैल गी होना ऐ। तौआई तमिलनाडू च विधानसभा दिएं 234 सीटें लेई 85 फीसद कोला मते वोट पे हे।



Wheat Procurement-MSP

केन्द्र सरकारै घट्टो-घट्ट समर्थन मुल्ल पर कनक दी खरीद लेई मजूदा रुतै दा लक्ष्य 15 फीसद बधाइयै 3 करोड़ 45 लकख टन करी दिता ऐ। खाद्य सचिव संजीव चोपड़ा होरें गलाया ऐ जे एह फैसला ओकड़े करसानें दी मदाद लेई लैता गेआ ऐ- जिंदी फसलें गी बेब्हारी बरखा करी नुकसान पुज्जा ऐ। कल नमीं दिल्ली च Roler Floor Millers Federation of India दे कनक दे सलाना सर्वेक्षण दे मौके पर श्री चोपड़ा होरें गलाया जे राज्य स्तर पर बी खरीद दे नमें लक्ष्य तय कीते गे न। उ'नै आखेआ जे हुन मध्य प्रदेश थमां इक करोड़ टन- उत्तर प्रदेश थमां ढाई करोड़ टन- राजस्थान थमां 23 लकख

50 जहार टन ते उत्तराखंड थमां 5 जहार टन कनक दी खरीद दी संभावना ऐ। चोपड़ा होरें दस्सेआ जे कनक दी खरीद लेई गुणवत्ता मानकें च ढिल्ल दिती गई ऐ। उ'नें आखेआ जे एहदे नै 2026-27 च कनक दे शुरुआती भंडार च तकरीबन 2 करोड़ 20 लक्ख टन दा बाददा होग जेहदे नै देशें च कनक दी कुल उपलब्धता तकरीबन 5 करोड़ 65 लक्ख टन होई जाहग।

<><><><><><>

RBI- Paytm Licence

भारती रिजर्व बैंक RBI ने Paytm Payments Bank दा लसैंस रद्द करी दिता ऐ। एहदे करी बैंक दे कारोबार पर फौरी तौरा पर रोक लगगी गई ऐ। रिजर्व बैंक नै मार्च 2022 च बैंक गी नमें गाहक जोड़ने पर रोक लाई दिती ही। बरे 2024 च बी बैंक पर बाद्दू बवसायिक पाबंदी दे तैहत मजूदा गाहक खातें ते प्रीपेड उपकरणें च कुसै बी चाल्ली दी जमा- क्रेडिट ते टॉप-अप पर रोक लाई दिती गई ही।

<><><><><><>

US Sanctions –China Oil Refinery

अमरीका नै चीन दी इक बड़ी तेल रिफाइनरी कम्पनी हेंगली पेट्रोकेमिकल रिफाइनरी ते ईरान दे तेल दी दुआई कन्नै जुड़ी दी तकरीबन 40 कम्पनियें ते टैंकरें पर आर्थिक बंदिशां लाई दितियां न। एह गेंह ईरान थमां तेल निर्यात गी सीमित करने लई नेह समें पर पुटटी गई ऐ जिसलै किश हफते परैन्त गै अमरीका दे राष्ट्रपति डोनाल्ड ट्रम्प ते चीन दे राष्ट्रपति शी जिनपिंग हुंदे मझाटै चीन च बैठक होनी ऐ। हेंगली पेट्रोलियम रिफाइनरी दी समर्थ हर रोज तकरीबन 4 लक्ख बैरल दी ऐ। अमरीका दे वित्त मंत्रालय

नै आखेआ ऐ जे एह रिफाईनरी बरे 2023 थमां ईरान कोला कच्चा तेल खरीदा करदी ऐ जिस करी ईरान गी कैंई करोड़ डॉलर मिला करदे न। ध्यानजोग ऐ जे अमरीका ने आलमी सतह उप्पर कच्चे तेल दी दुआई लेई महत्वपूर्ण जलमार्ग-होर्मुज जल डमरु मध्य दी नाकेबंदी बरोबर जारी रखी दी ऐ।

<><><><><><>

Iran -US Pakistan

ईरान दे बदेश मंत्री अब्बास अराघची कल चिरें रातीं अपने प्रतिनिधिमंडल दे कन्नै पाकिस्तान दी राजधानी इस्लामबाद पुज्जे। पच्छिम एशिया च जारी जंग खत्म करने लेई ईरान ते अमरीका बश्कार गल्लबात परतियें शुरु करने लेई कूटनीतिक जतन कीते जा'रदे न। इस गल्लबात च ईरान दे बदेश मंत्रालय दे प्रवक्ता इस्माइल बाकाई बी शामिल होगन। बाकाई होरें सोशल मीडिया पोस्ट च आखेआ जे ईरान दिएं चैंताएं गी पाकिस्तान दे जरिये अमरीका धोड़ी पुजाया जाहग। अमरीका बी कूटनीतिक सम्पर्क दे राहें समस्या दा हल कडइने दे जतन करा'रदा ऐ ते अमरीका दे बशेश दूत स्टीव विटकॉफ ते जेरेड कुशनर हुंदे बी इस्लामाबाद पुज्जने दी मेद ऐ। व्हाइट हाऊस दिएं प्रेस सचिव कैरोलिन लीविट होरें आखेआ ऐ जे दौनै पक्खें बश्कार सिद्दी गल्लबात होग। उ'नै आखेआ जे उपराश्ट्रति J.D. Vans वाशिंगटन थमां जुड़े दे रौहगन ते बदेश मंत्री मार्को रुबियो ते राश्ट्री सुरक्षा टीम दे कन्नै तालमेल करडन।

<><><><><><>

Jammu Srinagar -Vande Bharat

सैलसफा गी बढ़ावा देने ते इलाकाई सम्पर्क गी होर मजबूत करने दे मकसद कन्नै रेल मंत्रालय औंदी 30 अप्रैल थमां जम्मू ते श्रीनगर बश्कार वंदे भारत एक्सप्रेस रेलगड्डी दी सिद्धे तौरा पर सेवा शुरू करने दी त्त्यारी च ऐ। आकाशवाणी दे जम्मू संवाददाता नै जानकारी दिती ऐ जे इस रेल लिंक कन्नै दौने राजधानियें जम्मू ते श्रीनगर बश्कार जातरा दे समें च बड़ी मती कमी औग ते यात्रुएं गी मता आरामदायक ते भरोसेमंद साधन उपलब्ध होग। Semi High Speed Train दे शुरू होने कन्नै मेद कीती जा'रदी ऐ जे इलाकाई सम्पर्क बधोग ते यात्रियें गी कश्मीर घाटी च यात्रा दा बिजन कुसै रुकावट दे बेहतरीन अनुभव हासल होई सकोग- जेहड़ा जम्मू-कश्मीर च रेलवे दे बुनियादी ढांचे दे विकास च इक मील दा पत्थर साबत होग।



Satish -Mandviya Meet

खेड्ड मंत्री सतीश शर्मा होरें जम्मू-कश्मीर च आयोजित कीते जा'रदे “चिंतन” शिविर दे बक्ख-बाहरें केन्द्रीय युवा मामलें ते खेड्ड मंत्री मनसुख मांडविया हुंदे कन्नै तफसीली बैठक लाई। बैठक दौरान सतीश शर्मा होरें जम्मू-कश्मीर च खेड्डे दे विकास गी होर बढ़ावा देने लेई इक व्यापक खाके बारे तफसीली चर्चा कीती ते खास तौरा पर बन्ने ते दूर-दरेडे इलाके च पुज्ज बधाने पर जोर दिता। सतीश शर्मा होरें बैठक दौरान इस गल्लें गी उजागर कीता जे दूर-दरेडे इलाकें च रौहने आहले नौजवानें च बड़ी मती समर्थ मौजूद ऐ, जेहदा पूरा-पूरा लाह ठोआने दी लोड़ ऐ। इस दौरान मनसुख मांडविया होरें खेड्डे दे तंत्र गी मजबूत बनाने लेई केन्द्र सरकार दी तरफा पूरा समर्थन ते सहयोग दा भरोसा दोआया।



JK -Ravi-Bridge

भारतीय रेलवे दे इक वरिष्ठ प्रतिनिधिमंडल नै कल जम्मू संभाग दे कठुआ-माधोपुर इलाके च रावी दरेया पर बने दे रेल पुलें दी सुरक्षा ते तकनीकें दा जायजा लैता। इस दुरान भारी बरखे दौरान खराब होए दे इक पुलें गी परतियै बहाल करने दे कम्मै पर ध्यान केन्द्रित कीता गेआ। टीम नै परिचालन सुरक्षा गी यकीनी बनाने लेई पटरियें दी बवस्था ते Signal प्रणालियें दी बी समीक्षा कीती। इस दौरे दी अगुआई डिविजनल रेल मैनेजर विवेक कुमार- रेलवे सुरक्षा आयुक्त दिनेश चंद Deshwal ते उधमपुर, श्रीनगर, बारामुला रेल लिंक दे मुख्य प्रशासनिक अधिकारी आलोक मिश्रा होरें कीती।



Women Cricket

महिलाएं दे टी-20 क्रिकेट च भारत ते दक्खन अफ्रीका बश्कार 5 मैचें दी श्रृंखला दा चौथा मैच अज्ज जोहान्सबर्ग च खेड़येया जाहग। एह मैच रातीं साइडे 9 बजे शुरु होग। ध्यानजोग ऐ जे दक्खन अफ्रीका नै इस श्रृंखला दे पैहले 3 मैच जित्तियै एह श्रृंखला पैहले गै अपने नांs करी लैती दी ऐ।



IPL

आई.पी.एल क्रिकेट च कल रातीं बेंगलुरु च रॉयल चैलेन्जर्स बेंगलूरु नै गुजरात टाइटन्स गी 5 विकेटें कन्नै हराई दिता। गुजरात दे 206 रन्जें दे लक्ष्य बेंगलुरु ने 19में ओवर च गै हासल करी लैता। विराट कोहली प्लेयर ऑफ द मैच रेह।

आई.पी.एल च अज्ज दिल्ली कैपिटल्स दा मुकाबला पंजाब किंग्स कन्नै होग। दिल्ली च एह मैच दपैहरी साइडे 3 बजे थमां शुरु होग। अज्ज इक होर मैच च जयपुर च संजा साइडे 7 बजे थमां राजस्थान रॉयल्स ते सनराईजर्स हैदराबाद आमने-सामने होडन।

<><><><><><>